

DISPUTATIO INAUGVRALIS MEDICA,

SISTENS

VTILITATEM VENÆ-
SECTIONIS IN MORBIS ACV-
TIS PARTVRIENTIVM ET
PVERPERARVM,

QVAM,

AUXILIANTE NUMINE DIVINO,
RECTORE VNIVERSITATIS MAGNIFICO,
PRÆNOBILI ET CONSVLTISSIMO

DN. TOBIA JAC. REINHARTHO,

JCTO, SACRI PALATII CÆSAREI COMITE, IVRIDICÆ FACVLTATIS ASSES-
SORE ET COD. PROFESS. PVBL. ORDIN. NEC NON CIVITATIS
STNDICO ET CONSVLE,

AMPLISSIMO MEDICORVM ORDINE IN HAC PER-ANTIQA
HIERANA GRATIOSE INDVLGENTE,

SVB PRÆSIDIO

DN. LAVR. THEOPH. LVTHER,

MEDIC. DOCT. CHYMICÆ PROFESS. PVBL. FACVLTAT. MED. ASSESS. ORDIN.
ET CIVITAT. ERFORD. CONSVL. SENIOR. AC PHTSICI,

PATRONI AC PROMOTORIS SVI COLENDISSIMI,

PRO GRADV DOCTORALI

SVMMISQVE IN ARTE SALVTARI PRIVILEGIIS ET IMMVNI-
TATIBVS RITE ET SOLENNITER IMPETRANDIS,

PVBLICÆ ERVDITORVM DISQVISITIONI SVBMITTIT,

AVTOR ET RESPONDENS,

CHRISTIAN FERDINAND STREMEL,

Lauba-Lufatus.

IN AVDITORIO MAIORI COLLEGII MAJORIS, HORIS CONSVETIS.

DIE XXVIII. MARTII M DCC XXXIII.

ERFORDIÆ, Typis IOH. CHRISTOPHORI HERINGII, Acad. Typogr.

PATRIBVS
REIPUBLICÆ ZITTAVIENSIS,
VIRIS

MAGNIFICIS, EXCELLENTISSIMIS, AMPLISSIMIS
ATQVE CONSVLTISSIMIS DOMINIS,

DOMINIS

CONSVLIBVS,
SYNDICO,
SCABINIS,

CÆTERISQVE MEMBRIS

SENATORII ORDINIS

GRAVISSIMIS,

PATRONIS SVIS ET PROMO-
TORIBVS

OMNI HONORIS CVLTV DEVENERANDIS,
HANC DISSERTATIONEM INAVGVRALEM,
CERTISSIMVM ANIMI DEVOTI SIGNVM,

SVBMISSE

D. D. D.

RESPONDENS.



PROÆMIUM.



Enæsectionem magnum esse remedium, primo demonstravit PODALIRIVS, hujus evacuationis inventor, cum in filia regis Damæthi, cujus vita propter lapsum gravio-rem valde periclitabatur, eam summo cum fructu in utroque bracchio institueret, ita ut paulo post, in magnum solatium patris, pristinam sanitatem illa recuperaverit; vid. STEPHANVS BYZANTINVS in Voce Syrma. Hujus usum quoque perspexit HIPPOCRATES, quippe qui in Scriptis suis passim memoriæ prodidit, sanguinis evacuationem certo tempore maximè esse utilem; vid. *Sect. I. aph. 23.* Hæc

vestigia GALENI premit, multisque rationi-
 bus & experimentis contra Erasistrataeos illam
 eximie defendit. Sed Veterum testimoniis ho-
 die non opus est, præprimis quia jam ubique
 Medicina mechanica Excellentiss. HOFFMAN-
 NI florere incipit, ac insuper secundum Do-
 gmata BOERHAVII & aliorum hæc evacuatio
 in multis morbis commendatur & felicissime
 praxi confirmatur: Hinc argumentis tantorum
 Virorum convictus & experientia sæpius edo-
 ctus sum, quod quoque V. S. summo cum fru-
 ctu non solum in jam parturientibus, ve-
 rum etiam post laboriosum partum, itidem
 locum habeat, eaque propter, cum mihi ad al-
 tiora jam adspiranti ante omnia incumbat, ut
 Specimen inaugurale quoddam disquisitioni
 publicæ sistam, placuit in præsentiarum, pro mo-
 dulo ingenii viriūque imbecillitate, Venæse-
 ctionis summam utilitatem in morbis partu-
 rientium & Puerperarum acutis demonstrare.
 Faxit ergò Deus T. O. M. ut omnia in gloriam
 Ejus & ægotantium solatium, secundum Vo-
 ta, cedant!

I. N. J.

§. I.

Fœmina benè constituta & optimâ valetudine gaudens hîc ante omnia in considerationem venit, quoniam ea ut plurimum tam ante, quam post partum, V. S. ne quam maximè opus habet: Sub initium enim ingravidationis Embryo tenellus tantam vix consumere valet sanguinis copiam, quanta ordinariè ad ejus nutritionem versus Uterum defertur & affluit; hinc illa mox post primum mensem, in locis consuetis, ubi sanguis aliàs menstruis periodis evacuat, quosdam dolores persentiscit, ita ut quædam arietatio in istis vasis oboriatur, quæ tamen non sufficit ad elasticitatem horum vasorum superandam & sanguinem per illa loca expellendum. Altero mense dein elapso, gravida de majori dolore lancinante circa easdem regiones conqueritur, multisque aliis symptomatibus affligitur, ut nausæâ, horripilatione, dolore ventriculi, anxietate præcordiorum, dolore capitis, dorsi & aliarum partium, unde etiam post tertium mensem in foeminis cæteroquin sanis multoties abortus sequitur. Hæc omnia à sanguinis superflui per locum aliàs consuetum impeditâ evacuatione, ac utero intra abdomen ex pelvi ascendente, situm viscerum pressione suâ & circuitum humorum per illa parum mutante, dependent.

§. II.

His symptomatibus modo recensitis, secundum leges methodi medendi, consensu ferè omnium Practi-

corum nostris temporibus celeberrimorum, Venæsectione in brachio institutâ, certissimè succurritur: Hæc enim quantitatem sanguinis superfluam imminuit, inconsumptas congestiones ab eo factas resolvit, corpus debilitatum & torpidum agilius reddit, quia liberior humorum distributio per vasa & viscera promovetur, ubi insimul quoque profunt aromatica blanda, & antispasmodica temperata, quæ cum Diætâ tenui ritè adhibita, omnia reliqua accidentia, periculum futurum præfagientia, auferunt. In parturientibus verò & foeminis foetum jamjam enixis, V. Snem in usum vocare, plurimi Practicorum adhuc dubitant, licet experientia docuerit, in his casibus Venæsectionem neglectam sæpius præmaturæ mortis causam extitisse. Quanquam autem multi reperiantur Medici, qui pertinaces & meticulosi eam admittere haud volunt, etiamsi ratio & experientia contrarium demonstrent, nihilo tamen minus necessitas non rarò exigit, ut audacter in parturientibus & Puerperis largâ manu V. S. instituatur, quo non solum majora mala & ipsa mors præcaveantur, sed etiam sanitas labefactata citò restituatur, prout hoc ex sequentibus evidenter apparebit.

§. III.

Per partum autem difficilem talem conditionem corporis & foetus intelligimus, à quâ exclusio infantis maturi summâ cum molestiâ, partiumque genitalium & circumjacentium qualicunque læsione absolvitur. Inter causas naturales, quæ partûs maturi exclusionem impediunt, primariò temperies succulenta est referenda, ut in Sanguineo-phlegmaticis, quæ semper bono &

copioso sanguine abundant, observamus, in his enim vasa sunt exigua ac sanguine turgida, omnesque cellulae & interstitia humoribus & oleosis liquidis repleta, hinc saepe earum obesitas Uterum & Vaginam premit, & liberum foetui transitum intercludit, simulque accedente pressione foetus versus genitalia, sensim sensimque hae partes magis intumescunt & ita distenduntur, ut inde necessario via angustior & ad transitum foetus ineptior reddatur, licet alias haec temperies corporis in junioribus parturientibus maximè conveniens sit, quia corpus molle facile pressioni foetus cedit, & simul sufficientes humores, ad viam lubricandam, praebet.

§. IV.

Majorem attentionem meretur temperies sicca, praesertim in annosis & primo nuptis, primiparisque annum trigesimum jam supergressis, in quibus partes sunt nimis rigidae & strictae, Os uteri non sufficienter aperitur, sed validè resistit, quia vasculis gaudent paucioribus, quae humores tenues ad lubricandam viam sufficienter non exprimunt, partes etiam vicinae, praesertim osseae, circa juncturas jam nimis induratae, dilationem difficulter admittunt, unde exclusionem foetus retardant, liberaliorem autem sanguinis transitum infantis pressio impedit, ita ut mox vasa circa inguina jacentia ab humoribus impulsis magis magisque distendantur. Si ergo his artis auxiliis non succurramus, semper partus difficilis, imo vitae periculum, metuenda & praesagienda sunt, sicuti quotidiana experientia in siccis & jam adultioribus foeminis nos docet. Hinc talibus per aliquot septimanas ante legitimum partus

tem-

tempus commendanda sunt Fomenta, aut Unguenta emollientia, quibus partes genitales & regiones inguinales frequenter fovendæ atque inungendæ sunt, ut tempestivè aliqualis ipsarum obtineatur relaxatio.

§. V.

Sæpe quoque in fœminis aliàs ad parturiendum bene constitutis & cæteris conditionibus se ritè habentibus, præsertim in Primiparis, partus difficilior, laboriosior & periculosior redditur, dum conatus fœtus prodeuntis ex pudore supprimunt atque impediunt, aut ex instinctu naturali dolores incrementales timent atque abhorrent. Multæ quoque reperiuntur, quæ dolorum adeo impatientes sunt, ut sub eorundem augmento convulsionibus corripiantur, vel animi deliquia experiantur, licet jam fœtus situm legitimum ad exclusionem nactus sit, etiam per aliquod tempus contractiones naturales abdominalium musculorum ipsiusque Uteri hanc exclusionem promovere inceperint, unde dein vasa per uterum ejusque vaginam excurrentia fortiter pressa, turgidiora fiunt, ab his autem partibus tumefactis & sanguine repletis certissimè via, aliàs satis patula, angustior evadit, ut diuturno tempore, majori labore & multiplicatis cruciatibus, tandem fœtus excludatur.

§. VI.

Aër calidus & siccus, quemadmodum liquida interna rarefacit, vasa replet & distendit, ac simul externè liquidissima absorbet, nec non vasa in superficiebus jacentia exsiccat, ut partes humido necessario ad emolliendum destituantur: Sic quoque à laboribus parturi-

rien-

rientis partes humectantes citò dissipantur, insimulque majori labore via dilatatur, ita ut ad partum legitimum & maturum excludendum longum tempus requiratur. Propterea constitutio aëris nimis calida & sicca, ab arte emendationem in humidum expectare debet. Ordinariè enim aër calidus & humidus parturientibus optimè conducit, dum vasa ab eo relaxantur, & calore temperato in mollitie servantur, ut illa conatibus foetus laborantis & pressionibus matris minus resistent, sicque exclusio brevi temporis spatio absolvatur.

§. VII.

Aër ficcus & simul frigidus minime parturientibus conducit, quia totum corpus constringit, eò magis autem si simul temperies corporis sicca concurrit, ut in Cholericis & Melancholicis foeminis apparet, nam in tali statu liquida humectantia ac lubricantia hic summè necessaria jam deficiunt, & ab aëre adhuc sicco magis consumuntur, frigus autem externum liquida tenaciora & solida magis constricta reddit, unde partus laboriosus facile inducitur, sed arte medica, remediis in principio adhibitis emollientibus & calidis tales plerumque levamen accipiunt.

§. VIII.

Corpus à cibis nimis repletum exitum foetus pariter difficiliorem reddit, nam ventriculus & intestina distenta Uterum & foetum in eo inclusum majori mole premunt, adeò ut ille præ onere & pressione se vix ac ne vix quidem movere & flectere valeat ad situm convenientem acquirendum. Præprimis etiam infarctus crassorum intestinorum partum difficilem producit,

fæces enim induratae intestina distendentes magnam pelvis partem occupant, & infantis transitum impediunt; ast hoc indicans facili negotio remedio leniente & Clysmate tollitur, nam post quadrantis horæ spatium decoctum injectum cum scybalis induratis, lenissimè & certissimè expellitur.

§. IX.

Interdum quoque gravidæ corpus parum movent, vel vitæ sedentariæ sunt nimis deditæ, vel otiosè quiescentes jacendo tempus terunt, vel somno immoderato indulgent; quibus efficitur, ut parum sanguis attenuetur & distribuatur, è contra verò in his foeminis, vitam tranquillam gerentibus, humores immodice augeantur, imprimis quando simul alimenta evpepta nimium appetunt & frequenter ingerunt, ex his certe magna quantitas chyli præparatur, quæ non solum deperdita liquida cibo restituit, sed & majorem humorum copiam generat, hinc corpus aggravat, partum difficiliorem reddit, & post partum absolutum aut hæmorrhagiæ largiores, aut, lochiorum fluxu non rite succedente, inflammationes graves uteri, mammarum, cerebri, thoracis & viscerum abdominalium, imò febres exanthematicæ multoties periculosæ excitantur.

§. X.

Huc quoque pertinet præternaturalis tumor partium genitalium, quando nempe inflammatio à sanguine heterogeneo & impuro in istas partes ruente producit, viam angustiores pro foetu excludendo facit, imo sæpe cavitatem penitus claudit, dolores & cruciatus vehementes efficit, qui exclusionem foetus non per-

permittunt, nam inflammatio fortiter à foetu compressa, in gangrænam & sphacelum abit, quia illo tempore impetus sanguinis urget, hinc tumor, dolor & rubor continuo augentur; unde à vasorum distentione nimia destructio partium metuenda est. Eâdem ratione in Utero ipso aut partibus vicinis à continua foëtus immobilis pressione circulatio in multis vasculis impeditur ac sensim sensimque sistitur, sanguis ibi hærens à novo affluente omni momento pellitur & comprimitur, liquidiora quidem, ut aquosa, per minimas aperturas transsudant, crassiora vero, ut particulæ rubræ sanguinis, magis impinguntur. Hinc tales foeminæ à repletionem canalium sanguiferorum, serosorum & lymphaticorum violentâ, distractiones validas & acutas percipiunt, motus sanguinis & febris increscunt, in partes obstructas actio sanguinis arteriosi fit impetuosior, sequitur obstructio gravior & pertinacior, qui vix ac ne vix quidem resolutionem admittit, sed multo magis vasculorum destructio subitò subsequutura prædicenda erit. Sic res se habet in reliquis inflammationibus tempore partûs se manifestantibus, quando nimirum regionem colli, thoracis aut abdominis occupant, tunc omnino exclusionem foetus valde dolorificam reddunt, imo inflammationes in istis partibus, ab aucta corporis commotione, qui eo tempore maxime requiritur ad foetum expellendum, exasperantur, ut citò in summum inflammationis gradum abeant & gangrænescant. Hinc omnes causæ, quæ in parturientibus acutissimis doloribus corpora infestant, semper in salutem parturientium sollicitè & omni studio erunt removendæ;

earum enim constantia tam exclusionem foetus impedit, quam graves & periculosos eventus prænunciat.

§. XI.

Foetus jam mortuus omnium maximè laboriosum partum inducit, quia ille immobilis jacet, situm convenientem non acquirit, nec ullo conatu exclusionem adjuvat, sed firmiter in quiete manet, atque ut corpus sine motu & vitâ tantum premit, hinc partum magis impedit & retardat, unde certè tales foeminæ miserrime cruciantur, ut sæpe ab immoderatis earum pressurionibus versus inguina, vasa pulmonalia rumpantur, & ita Hæmoptysis producat, dum validis strictionibus musculorum abdominalium & retentione aëris diuturnâ foetum urgent, sed lentissime propellunt. Interdum ob molem foetus magnam & resistantiam partium genitalium nimiam, à valida distractione, peritonæum disrumpitur, aut labia pudendorum à se invicem secedunt; multoties quoque peritonæum, propter magnum nisum, læditur, unde sæpe herniosæ fiunt foeminæ.

§. XII.

Sed foetus ipse adhuc vivens sæpe quoque occasionem partus difficilis præbet, dum aut ex errore proprio cum capite in latus versus os ischii, vel antè in os pubis, vel posterius in os sacrum, fortiter impingit, eâdem ratione uterus gravidarum situm naturalem ex recto in obliquum mutat, dum sc. in gravida supra os pubis ascendit intra abdominis cavitatem, ubi ratione ponderis sui, secundum diversos matris motus, nec non à compressione intestinorum, fundus ejusdem situm muta-

mutare potest in latus dextrum aut sinistrum; Pariter quoque partus redditur difficilis ex festinatione obstetricum nimia, dum parturientes præmature, levioribus adhuc doloribus se manifestantibus, adhortantur, ut partum valido nixu promovere studeant, cum tamen foetus situm debitum, ad ultimam sui exclusionem aptum, non acquisiverit, aut obstetrices nimis citò tunicas foetum includentes dilacerent, ut aquæ effluant, licet de situ legitimo adhuc incertæ sint, ubi his evacuatis infans se ritè movere non valet, quia intestina & muscoli abdominis jam vehementius in foetum premunt, cum antea aquæ circa infantem fluentes fortior pressioem impediabant, & sic infans in aqua magis liberè se movere & convenientem situm eligere valebat. Hinc statim omnis labor eò dirigendus est, ut foetus in viam naturalem deducatur ac dirigatur, de quo potissimum consulendus est, van DEVENTER in arte obstetricandi.

§. XIII.

Effectus, qui à partu difficili producuntur, ex consideratione hujus laboriosæ actionis, præsertim si quædam causæ vel naturales, vel præternaturales, vel non-naturales, in præcedentibus descriptæ, concurrunt, facile à peritis Anatomicis & Practicis dijudicantur: Nam foetus maturus & sanus ad exitum tendens, se in ergastulo suo, nimis angusto licet, quaquaversum movet, si non turbatur, donec sentiat partes externas sibi cedere, tunc in illas impetuosè premitur, & perpetuo conatu ac motu muscoli abdominales in consensum trahuntur, qui simul expulsionem urgent, & sic, si omnia

ritè se habent, partus facili negotio in lucem prodibit; Contra verò, ubi omnia naturæ male dispositæ, vel erranti relinquuntur, utique Partus admodum difficilis erit: 1) urgentibus enim conatibus naturæ, non solum omnes impulsus matris sunt supervacanei, sed etiam totum corpus illius enormiter defatigatur & viribus privatur, dum propter continuos parturientis labores sanguinis motus excitatur & magis acceleratur, qui interdum ope remediorum Cardiacorum & stimulantium mirum in modum augetur, ut per sudorem humores tenuiores continuo expellantur, sanguis vero diluente liquido destituatur, exinde reliqua sanguinis massa fit densior & ad inflammationem aptior. 2) Hinc post diuturnam & laboriosam foetus exclusionem adest jam sanguis inflammatus & corruptus, qui prudentissimè statim ab adstantibus Consilio Medici tenuibus blandis & antacidis, ut jusculis carniarum recentibus cum herbis & radicibus aperientibus decoctis, corrigendus est. Certè hic à vulgo magni errores committuntur, præsertim quia non nisi cardiaca calida hic adhibenda esse autumat, quo vires deperditæ citò restituerentur; ex eadem ratione imprudenter suadent adstantes vinum malvaticum, Hungaricum, Canariense &c. aut puerperis Ess. aromaticas, analepticas, Salia volatilia oleosa propinant. 3) Partes circa genitalia jacentes & pudenda ipsa eo tempore, dum foetus exitum intendit, à mole infantis sæpe eximiè premuntur & distenduntur, multo magis autem distractio & valida dilaceratio istarum partium succedit, quando magnitudo foetus inconveniens, situs irregularis, parturiens

riens annosa, primipara, foetus mortuus, vel aliæ circumstantiæ partum impediētes simul adsunt, ex quibus certissimè à foetus expulsionē magna partium genitalium læsio præsagienda erit. 4) Ab adhibitis autem prædictis remediis calefacientibus motus febrilis necessario augetur, inflammatio sanguinis vehementior redditur, ita ut facile sanguis circa fundum Uteri stagnet, vasculaque minima ibidem dilacerata & constricta obstruat, unde cum sanguis versus illa naturaliter perpetuo impellatur, utique sensim ibi stasis & inflammatio produci potest. 5) Post aliquot dies Uterus paulatim se iterum constringit, adeoque tunc non tantum sanguinis, ut antea, admittit. Vasa enim à substantia Uteri compressa & angustiora facta, impulsui magis resistunt, & sanguis nunc majori impulsu vel impetu urgetur versus arterias hypogastricas, liberè jacentes, quæ sanguinem postea versus mammas vehunt, quia hæ sunt corpora mollia, supra musculos jacentia, quæ à vicinis partibus non premuntur & parum resistunt, sicque impetum circulationis naturaliter facile admittunt atque intumescunt; verum in principio stricta mammarum vasa aliquali resistantiâ prædita, non statim impulsui humorum cedunt, sed gradatim dilatantur, exinde tertio plerumque die post partum ab impetu versus easdem aucto, puerpera horrorem & motum febrilem sentit. 6) Hæc febris certè à copia sanguinis & diathesi inflammatoria maximopere augeatur, tumores mammarum magnos inflammatos & in suppurationem tendentes, excitat, aut circumspectâ curatione, exsiccantibus nempe & discutientibus materiâ
flui-

fluidissima dissipatur, terrestres & fixiores particulæ in interstitiis obstructis glandularum remanent, dolor quidem & inflammatio cessant, sed tumor durus & frigidus, ad naturam scirrhi proximè accedens, relinquitur, qui, si præprimis per externa male tractatur, successu temporis facillime in Cancrum degenerare solet. 7) Præterea quoque à tali dispositione inflammatoria communiter gravior orgasmus humorum per totum corpus excitatur, sub quo deinde partes heterogeneæ vel à nimio parturientis labore generatæ, vel per stimulantia & calefacientia acria magis exagitatae, intra vasa secretoria propelluntur, & tandem sub variorum exanthematum forma per superficiem externam corporis eliminantur.

§. XIV.

Hinc ante omnia puerperis circumspecta & temperata Diæta atque medendi methodus præscribenda est, ipsæque considerandæ ut personæ graviter vulneratæ, ob quam causam illis præcipue talia exhibenda erunt, quæ humores tenues & blandos à prægressis laboribus consumptos, restituunt. Profunt itaque mollia, concoctionis facilis, quæ jam in se partes nutritias magis resolutas continent, ut sunt juscula carniū recentium, decocta cum gelatinosis blandis, ut hordeo, tritico, amygdalis, Oryza & similibus, aut radices Petroselini, Apii, Cichorei, Scorzonæræ, Asparagi &c. cum jusculis recentibus concoquuntur, conjunctis remediis antispasmodicis, cum levissimis aromaticis, præcipuè in foeminis non admodum plethoricis & cholericis, nec dolo-

doloribus enormibus afflicti, sub quorum prudenti usu, illæ brevi tempore ad statum naturalem redeunt.

§. XV.

Proinde etiam causæ partum difficilem provocantes supra recensitæ bene examinandæ & consideratè à Medicis sagacioribus perpendendæ sunt: Primò omnium perpendenda erit temperies sanguinea, humoribus laudabilibus prædita, juxta §. II. nec minus corpus crassum, humoribus lentis & crassis abundans §. VIII. ut & inflammatio, motus febrilis, doloresque acuti exinde suborti, in parturientibus occurrentes, §. IX. Certè in his subjectis sub auctiori motu circulatorio sanguinis omnes in corpore humores validius agitantur, qui postea cum impetu versus partes obstructas propelluntur, simul liquida à motu & calore aucto rarefiunt, magisque se expandunt, vasa replent & majori impulsu distendunt, ut postea omnia membra ab humoribus tumefacta appareant, corpus mirum in modum defatigetur & debile evadat, maximè à copia sanguinis gravante, & vascula minima nimium comprimente, hæcque ratione oritur malignitas à Medicis Chemicis abusive in morbis acutis semper accusata, quæ tamen solum dependet à sanguine copiosè & orgasticè exagitato, hoc enim in principio ritè & largâ manu ex vena magna evacuato, ut liberior circuitus & humorum æqualis distributio cum liquidis dilutis per totum corpus restituatur, certo certius maligna symptomata subito evanescunt, prout hoc felicissimo successu in foeminis jam parturientibus, imo in infantibus acutis morbis laborantibus, cum admiratione adstantium Præceptor

ptor meus Clarissimus, Dn. D. Lœberus, præstitit, cum è contra Chemici cum suis panaceis & remediis bezoardicis restitutionem sanitatis & remotionem malignitatis haud promittere valeant. Nam tales foeminae sine evacuatione sanguinis sibi relictæ & optimis bezoardicis tractatæ, semper gradatim in statum deteriore ruunt, quia hæc remedia virtute stimulante prædita sunt, qua motus sanguinis per canales multiplicantur, ejusque partes subtiles, scil. lymphæ & spiritus, attritu continuo & vehementi per vasa minima exhalantia, dissipantur, humores crassiores in massa sanguinea relictæ comprimuntur, condensantur, ac magis inflammantur & corrumpuntur, ut in locis obstructis & vasculis secretoriis tenaciter hæreant, in parte autem læsa inflammationem valide augeant, cum destructione vasorum, & corruptione humorum mox subsequutura. Imo sæpe omnia viscera inflammantur, & in superficie partium maculæ rubræ & purpureæ, cum summa debilitate & prostratione virium, proveniunt, quæ communiter imminuentem mortem indicant. Sic etiam immatura exclusio foetus non solum à febris producitur, sed etiam à calore febrili prædominante ejus suffocatio metuenda, aut post partum peractum sanguinis eruptio, quæ ægram facile in vitæ discrimen conjicit, expectanda erit.

§. XVI.

Rebus sic stantibus viribusque adhuc vigentibus, nec liquidis jam corruptis, in foeminis mox parturientibus nullus Medicorum, virtutes circulantis sanguinis exa-

examinans, & leges mechanicas ritè callens, secundum quas effectus futuros dijudicant, V. Sectionem hic timebit, sed bono animo & consilio principiis solidis fundato eam audacter instituet, ut pericula mala secutura præcaveat tristemque eventum arceat. Nullum enim præstantius & efficacius, Venæsectione, remedium habemus, non solum quantitas nimia sanguinis, vasa circa genitalia maximopere infarciens ac distendens, imminuitur, liberiorque humorum circulus promovetur, sed etiam omnis resistentia partium & vasorum tollitur ac viæ laxantur, simulque tonus musculorum abdominalium augetur, laxatis verò genitalium partibus partus facile succedit, aliàs enim inflammatione præsentē ac continuante, & viis non ritè dilatatis, foetus difficillimè excluditur: Hinc optime monet Hollerius, ut tota natura concurrat, deindeque foetum expellat. Certe hic & in omni inflammatione discutiendâ sanguinis missione non peccatur, si autem illa vel ex metu, vel ex negligentia omittatur, tunc eventus admodum anceps erit. Optimè igitur scribit HIPPOCRAT. *Lib. I. de morb. mulier.* quod si prægnans diutius immoretur & parere non possit, sed pluribus diebus partus doloribus crucietur, (sit autem juvenis & ætate florens, multoque sanguine redundet,) Venas in malleolis secare oporteat, & virium habita ratione sanguinem detrahere. Nam gravissimi morbi & periculosiores eventus prævidentur, juxta §. IX. XIII. num. I. & XV. Sic vehementia morbi omnino sanguinis evacuationem omni tempore postulat, quæ, si pro multitudinis ratio-

ne non celebratur, utique pejorem & periculosiorem reddet morbum. Propterea etiam recte scribit HIPPOCRATES *Sect. V. Aph. 30. Si mulier gravida acuto morbo corripitur, lethale; & in alio loco dixit similiter: Si mulier utero gerens Peripneumonia, Pleuritide, Phrenitide & ardente febre corripitur, aut Erysipelas in utero fiat, necessitatem habet, ut ab ipsis perimatur. Hoc effatum HIPPOCRATIS rarissimè fallet, si nempe gravida sibi relinquitur, sed tempestivè ipsi succurrendum est cum V. Sne, quippe quâ ZACVTVS LVSITANVS multas gravidas robustas, aut morbis acutis detentas, inprimis largiori & iterata, à magnis malis liberatas fuisse scribit. vid. ejusd. *Histor. Med. Princ. Lib. I. obs. 30.* ubi mirabilem Historiam refert, de foemina juvene biliosa & gracili, quæ, cum septimi mensis foetum in utero gereret, ob metum absentis mariti abortum procurare intendit, variisque adhibitis remediis V. Snem quoque in usum vocavit, & per intervalla tredecim sanguinem è saphæna emisit, sed nunquam voti sui compos evadere potuit, quin potius, his omnibus frustra tentatis, geminas nono mense obesas & ovantes edidit in lucem, *conf. Lib. I. Med. princip. hist. observ. XXV. & Lib. II. praxeos admirandæ observ. 144.* Idem ZACVTVS *l.c. obs. 145.* refert, se in gravidâ Angina oppressa, septies in die V. Snem usque ad euphoriam adhibuisse, & foeminam feliciter ab hoc morte liberaffe; Eadem ratione in gravida, Causo correpta, sanguinis missionem largam in usum vocavit, undè foemina benè convaluit, *Lib. c. observ. 146.* Hinc in *Cap. de regimine prægnantis* rectè pro-*

pronunciavit, V. Snem in gravida valde necessariam esse, dicens: Sanguine non extracto, pro plenitudinis & morbi ratione, morbus insolescit & foetum vel matrem interimit. *Lib. III. prax. admir. cap. XV.* Ex hujus Viri celeberrimi experientia apparet, V. Snem in omni graviditatis tempore convenire, nec ullam noxam parere, maximè autem illa indicatur, quando gravida ab acuto morbo & doloribus intolerabilibus circa partus tempus infestatur: Sic in ultimis mensibus felicissimè Phlebotomiam adhibuit PETRVS BORELLVS in foemina Synocha simplici, sed violentissima cruciata, cui secundo die morbi vena secta fuit, tertio rursus ex eodem brachio dextro, & sub vesperam ex sinistro pro tertia vice, dein jusculis refocillata, quarto die foetum maturum emisit, ac postea sensim plenariè iterum convaleuit, *vid. Cent. 4. obs. 24.* Mirum in modum etiam laudat BINNINGERVS V. Snis utilitatem in parturientibus, refert enim casum partus difficilis, in quo apertio saphænæ præsentaneum fuit remedium, *Cent. 4. obs. 9.* sed mortuorum testimoniis hodie non opus est, quoniam moderni Medici non solum in gravidis febricitantibus, sed etiam in jam parturientibus optimo cum successu sanguinis evacuationem instituunt.

§. XVII.

In Casu §. IV. descripto, peccante nempe corporis siccitate, magnam utilitatem V. S. præstabit, dum illa vasa laxat, ut humores in ipsis contenti se expandere atque in tenuiores resolvi queant; sic quoque in Primiparis, deficiente adhuc debita partium relaxatione, juxta §. V. evacuatio sanguinis magnum levamen, se-

cundum §. XV. & XVI. affert, nec minus in statu §. XII. recensito, interdum sanguinis evacuatio erit necessaria, ut circumstantiæ inflammationem æmulantes Medico perito indicabunt. ZACVTVS LVSITANVS felicissimo eventu experimentum instituit, in juvene benè alias constituta & succulenta, quæ præservatoriam sanguinis detractionem omisit: Hæc ob plethoram foetum mortuum nonimestrem expellere non poterat, plurima per duas dies sunt tentata præsidia, cum autem foetus per nimis angustas vias penetrare non posset, è saphæna sanguinem emisit; hoc auxilio applicato foetus ad imum ventrem magis vergere videbatur, & illa à præcordiorum dolore, quo antea nimium premebatur, liberabatur, *vid. Lib. II. praxeos admirand. obs. 164.* Vesperi ZACVTVS ad illam redit, & de his omnibus certior factus, ex altera saphæna sanguinem detraxit, postquam ante diluculum partum exclusit. Magna ergo est non solum ad vivum, sed ad mortuum quoque foetum excludendum, Phlebotomiæ utilitas in actuali nisu, hac enim methodo superveniens inflammatio tutissimè avertitur, & viæ laxiores redduntur. Ultimo commendo Consilium Dni FRANCISCI CALMETTE *Lib. III. de morbis mulierum Cap. XVII.* in partu difficili datum, dicentis: V.S. quoque in pluribus casibus celebranda, præsertim dum mulier debilis non est, ubi non rarò partum faciliat.

§. XVIII.

Secundum hæc tradita circumspectus & expertus Medicus facile de reliquis circumstantiis Venæsectionem indicantibus judicabit. Præterea in omnibus puer-

puerperis interne summi usus sunt Decocta aperientia & diæta tenuissima, nullo modo sanguinem movens, §. XIII. n. 2. & §. XIV. ut & anodyna vespertino tempore cum absorbentibus & antihysteriis propinata. Externe in parturientibus prosunt medicamenti in forma Fomenti, Clysteris, unguenti & linimenti §. VI. VII. & VIII. His mature & convenienti tempore adhibitis, non solum foetus bello modo prodibit, sed etiam multa mala §. VIII, IX, X, XII. recensita præcaventur.

§. XIX.

Sed post partum difficilem peractum affectus producti & adhuc durantes sæpissime evacuationem sanguinis requirunt, si nempe foemina multis in locis est vulnerata §. XIII. n. 3. 4. 5. & tamen insimul constitutione bona, §. II. descripta, gaudet, aut si fluxus lochiorum minus succedit: Hinc illam jam HIPPOCRATES commendavit in libr. I. de morbis mulier. dicens: *Interdum vero purgamenta minime exeunt, verum id mulieri exitium portendit, nisi quis celeriter venam incidat, aut alvum emolliat.* Morbi enim à suppressione lochiorum periculosi & lethales superveniunt, fiunt nempe inflammatio Uteri, febres simplices & exanthematicæ, difficiles respirationes, Anginæ, Pleuritides, Apoplexiæ, Maniæ, phrenitides & alia mala, quæ sibi relicta certe puerperam in vitæ discrimen inducere possunt. Hinc PETRVS SALIVS DIVERSVS de affectibus particularibus c. 23. de morbis puerp. optime monuit, dicens: *Tamen cum à partu statim & per primos illos dies copiose naturaliter expurgentur mulieres, nulla alia tentanda est sanguinis evacuatio, quam quæ à natura recte & naturaliter operante, dirigi.*

rigitur; quæ tamen si supprimatur, vel imminuatur, tum ad
 tollendum morbum & affectum præternaturalem, tum ad
 provocandam naturalem evacuationem, secantur venæ infe-
 riores & copiose mittatur sanguis, quoniam copiosa etiam esse
 debet, ex præscripto naturæ, mensium tunc temporis purgatio.
 Si itaque natura vegeta & sanguine plena copiose san-
 guinem fundere nequit, seu illa evacuatio naturæ ne-
 cessaria & proficua plane supprimitur, tunc Venæse-
 ctionem maximopere MERCATVS commendat, *libr.*
IV. de morbis mul. cap. X. dicens: Quodsi sanguinis abun-
dantiam suppressioni causam præstare certum sit, nullo alio
auxilio tutius & certius malo medeberis, quam copioso san-
guine per venas tali effuso; tunc enim natura potentior red-
data, supra residuum id facilius per consuetum sibi locum ex-
pellit. Confer. RODERICVS à CASTRO *de morbis mul.*
lib. 4. C. XII. Hanc sententiam defendit CASP. BRAVO
in resolutionib. Tom. II. P. VI. Consultat. III. §. 4. ubi in-
quit: Si verò ex lochiorum refluxu in superiores partes su-
perveniant puerperarum morbi, semper ex pede sanguis est
mittendus. Diminuto dein lochiorum fluxu sanguis na-
 turali motu ad mammas adscendit, §. XIII. n. 5. quan-
 do vero tunc foetus jam est mortuus, vel puerpera ipsa
 eundem lactare sibi non proposuit, utique etiam immi-
 net periculum, ob adauctam plenitudinem & sanguinis
 orgasmum, ex diminuta purgatione obortum, ea-
 que propter MERCATVS & BRAVO suadent ex talo
 sanguinem mittere, ad motum illorum humorum revel-
 lendum. ZACVTVS mirabilem puerperæ historiam *L. I.*
Prax. admir. Obs. 145. refert, his verbis: *Fœmina robu-*
sta à lochiorum suppressione in syncopen cardiacam
 lapsa

lapsa est palpitacione & anxietate præcedentibus ; tandem cadaveris instar ad pedes lecti jacebat, communi consensu adstantium medicorum ex talo 4. horarum spatio bis sanguis exhauriebatur, femoribus cucurbitulæ admovebantur. Quibus non sufficientibus urgente necessitate, ut sanguis impactus è parte propinquo-
 ri evacuaretur, basilicam sinistram feriendam ZACV-
 TVS imperavit, & vesperi cucurbitulas scarificatas, co-
 stis affigere jussit omnibusque his uno die celebratis
 simul adplicatis glandibus oculos aperuit, & à morte
 liberata fuit. Sic FRIDERICVS HOFFMANNVS in
Diss. clinic. de Inflammationibus. V. Snem in lochiis su-
 pressis ad præcavendas febres exanthematicas valdo-
 pere commendat.

§. XX.

Proinde etiam licet purgatio naturalis largiter flu-
 xerit, puerperæ tamen sæpe acutis morbis corripun-
 tur. HINC FERNELIVS *Libr. II. method. medend. c. VIII.*
 aperte dixit : *Atque etiam in puerperis quæ rite purgan-
 tur ob febris ardorem sanguis è cubito demendus.* Certe
 singularem & admirandam historiam refert FRANCIS-
 CVS VALLERIO LA, *Libr. V. observ. medic. obs. X.* de fœ-
 mina pharmacopœi primipara, quæ post felicem par-
 tum frigori imprudenter se exponit, altero autem post
 partum die, pleuritite acutissima corripiebatur cum fe-
 bri intensissima, tussi valida & spirandi difficultate tan-
 ta, ut præfocari sibi videretur, neque enim, nisi summa
 cum angustia, spiritum trahere poterat, lateris dolore
 premente adeo, ut in præfocationis periculum ægram
 induxerit. Sanguis mittitur contra suorum omnium

vota (quod à partu fatigata & sat sanguinis per purgationes muliebres effluxisset,) & alia oportuna auxilia adhibentur integre & magna omnium admiratione curatur. Sic quoque AMATVS LVSITANVS *Centur. I. Observ. 34.* refert de puerpera quæ septimo die febre premebatur post clysteris usum Saphenam aperuit & ad ℥vij. sanguinis emisit, altera die iterum cephalicam secavit & sanguinem ad ℥v. detraxit, sine ullo periculo. Item de alia puerpera XXV. annorum puerum feliciter enixa & incaute aëri fligido se exponente refert, quod septimo die febre continua cum dolore laterali & delirio correpta, & eodem die ipsi ex saphena sanguis missus fuerit, à quâ etiam evacuatione magnum levamen sensit & convaluit PETRVS SALIVS DIVERSVS in pleuritite & aliis inflammationibus ob vehementiam morbi licet puerpera satis purgata sit, primo evacuationem in pedibus instituit, & si illa non sufficit statim ad sectionem venarum superiorum deveniendum esse, vehementer inculcat. NICOLAUS FONTANVS Practicus Amstelodamensis in *Consultat. exempl. X.* Casum puerperæ apoplecticæ habet, quæ sectione venæ cephalicæ sanata est.

§. XXI.

Ex his præmissis rationibus §. XVI. & XVII. & experimentis tot practicorum celeberrimorum probatis, §. XIIIX. XIX. & XX. tutissime concludimus in casibus parturientium & Puerperarum descriptarum si circuitus humorum & dolores invalescant, summopere evacuationem sanguinis esse necessariam; quod assertum coronari-

ronidis loco cum assensu celeberrimi Practici FRIDERIC. HOFFMANNI probabo, qui variis dissertationibus miris laudibus V. Snem in febribus exanthematicis puerperarum, extollit, dicens: *Interim sancte affirmare possumus, quod solius V. Snis, pro circumstantiarum ratione largioris vel in pede vel in manu institutæ ope, proximas jam morti puerperas & spasticis stricturis, quibus sanguis impetuosè ad cor, & cerebrum urgebatur, detentas ab orci faucibus revocaverimus, & præsentem opem attulerimus.* vid. Disp. de purpuræ genuina origine indole & curatione §. 57. 1725. hab. Hæc verba verissima auro pretiosiora omnibus prudentibus practicis valdopere commendo.

§. XXII.

Sed dolendum est quod multi Medici hoc remedium, tam ratione quam experientia probatissimum, in tempore necessitatis in usum vocare haud velint multasque tam nobilissimas, pariter ac virtutibus egregiis præditas foeminas à morte liberare vix audeant, sed imperite & minus circumspecte illud in omnibus inflammationibus & febribus puerperarum, in detrimentum ægrotantium negligent, timeant & abhorreant: Cum tamen puerperæ vegetæ & aliàs sanæ febre tantum acuta aut simplici inflammatione laborantes secundum præcepta medicorum Mechanicorum tuto ac facile sanari queant; nam quæ morbo acuto pereunt à vehementia morbi in destructionem partium vergentis interimuntur; sed ars hanc vehemenciam, mitigare valet V. Sne ritè institutâ & sufficientibus temperantibus & diluentibus adhibitis, adeoque com-

complures puerperæ aut ex negligentia propria, aut adstantium & Medici incuria, febre extinguuntur. Tutius ergo erit omnem diligentiam adhibere ut veritas in solamen conscientiæ nostræ elucescat, & optimâ viâ in morbis debellandis ad salutem ægrotantium incedamus. Interim Deo T. O. M. pro concessis hætenus viribus gratias persolvo humilimas, Ipsumque devotissimè implorô, ut impofterum quoque in honorem & gloriam Sanctissimi Nominis sui & ægrotantium levamen laboribus & conatibus meis benedicere velit.

S. D. G.

